



Albisteak

Jardueraz betetako Sagardoetxearen 15. urteurrenaren ospakizuna

Sagardoetxean bertan prentsaurrekoa ospatu zen atzo 15. urteurrenaren ospakizunerako egitarauaren berri emateko eta bertan izan ziren Xabier Urdangarin (Astigarragako alkatea eta Sagardun Partzuergoko presidentea) eta Eusko Jaurlaritza zein Foru Aldundiko zenbait ordezkari.

2021-09-23





Sagardoetxea Museoa sagardoaren kultura mantendu nahiz sustatzeko lanetan aritu da 2006ko irailean bere ateak ireki zituenetik. Hala, 2021an 15 urte ospatuko ditu Sagardoetxeak eta jarduera ugari antolatu dira herritarrek sagardoaren kulturaz eta sagardogintzako kultur ondareaz gozatzeko.

Sagardoetxeak 15. urteurrena ospatzen du, baina Astigarragako herriak 50 urte inguru daramatza sagardoaren kultura eta ondarea bultzatzen: Sagardo Egunaren ospakizuna, pieza etnografikoen bilketa, baserri eta piezen argazkiak, Sagardoaren Hitzegirako hitzen bilketa, etab.

Xabier Urdangarin alkateak, Sagardoetxeak urte hauetan sagardogintzako kultur ondarea mantentzeko egindako lana azpimarratu eta ondare hori datozen belaunaldiei erakusteko Astigarragak herri gisa duen erantzunkizuna azpimarratu zituen prentsaurrekoan. Ondoren, Sagardoetxearen 15. urteurrenaren ospakizunerako antolatu den egitaraua aurkeztu zuen: Gordailua (Gipuzkoako Ondare Bildumen Zentroa) eta Sagardoetxearen arteko elkarlanari esker, Ubegi baserriko XVI. mendeko dolare ardatza ikusgai egongo da Sagardoetxean. Honetaz gain, Sagardoetxeako Dokumentazio Zentroaren erakusketa antolatu da eta bertan katalogatuta dauden funtsak (dokumentuak, hemeroteka, argazkiak, etab.) ezagutzeko bisita gidatuak izango dira. Herritarrek ere izango dute kultur aisialdiaz gozatzeko tarte eta larunbat honetan, irailak 25, familientzako bisita gidatu nahiz tailer ezberdinetan parte hartzeko aukera izango dute.

Sagardoetxearen 15. urteurreneko [egitaraua](#)

Azpimarratzekoa da kulturaren arlotik sagarra eta sagardoaren ondareari eman nahi zaion babesa. Bingen Zupiria Sailburuak, Sagardoetxeak bere Dokumentazio Zentroan nahiz Jaurlaritzako ENSIME aplikazioan gordeta duen ondarea balioan jarri eta "Ondarearen zaintzaren ikuspuntutik bidelagun" izaten jarraitzeko asmoa azpimarratu zuen. Bestalde, Maria Jose Telleria Aldundiko Kultura Zuzendariak, "Sagardoetxean ikusgai dagoen Gordailuak utzitako Ubegi baserriko dolare ardatza denon arteko elkarlanaren ikur bat" izatea nahi dugula adierazi zuen.

Turismo arlotik ere, sagardoaren kultura esperientzia garrantzitsua da Euskadin. Javier Hurtado Sailburuak adierazi zuenez, "Sagardotegiko esperientzia erritu bat eta enogastronomia gizarte-jarduera gisa ulertzeko modua da". Bestalde, Iker Goiria Aldundiko Turismo Zuzendariak adierazi zuenez, "Sagardoaren esperientzia Gipuzkoako 10 top esperientziatako bat da eta Sagardoetxeatik esperientzia hau munduratzeari garrantzitsua da".

HAZItik ere lan handia egin da azken urte hauetan bertako sagarra eta sagardoaren alde. Peli Manterola zuzendari orokorrak aipatu zuen moduan, "Azken urteotan gertatutako ekintza garrantzitsuena 2017ko Jatorri Izendapenaren sorrera izan da eta hori elkarlanaren emaitza izan da".